



**Wan gaed blong ol apliken blong Pacific Engagement Visa (PEV):**

# Hao blong lukaotem mo aplae onlaen blong ol wok

Gaed ia hem i blong helpem ol apliken blong PEV blong lukaotem wok long Ostrelia, blong aplae long ol wok mo blong toktok wetem ol emploia.

## Plan blong lukaotem wok

Sapos yu mekem wan gudfala plan blong lukaotem wok, bae hem i helpem yu blong stap oganaes gud, yu stap rere mo bae yu gat moa janis blong faenem wok we i stret long yu. Ol apliken i sud folem ol tingting ia:

### Lukaotem wok hem i wan wok

Hem i no isi blong lukaotem wok. Bae yu mas mekem gud, yu stap glad oltaem, yu no givap mo yu stap pesien

### Planem program blong dei

Mekem taem long evri wik blong lukaotem wok

### Putum ol gol we yu save ajivim

Eksampol: yu tingting blong aplae long 3-5 difren wok evri dei, o yu lukaotem wok blong 3-4 haoa long evri dei o wik

### Kipim ol rikod blong lukaotem wok

Raetemdaon evri wok we yu bin aplae from. Inkludum ol infomesen long rikod ia olsem nem blong kampani, rol blong wok, link blong websaet mo deit we yu bin aplae long hem. Bae hem i help blong mekem yu stap oganaes gud.

## Kontaktem ol haering maneja (hiring managers)

I gud sapos yu stap kontaktem ol haering maneja tru long fon o long imel blong yu save bildimap ol rilesensip we i moa strong. Hem i impoten blong:

### Mekem risej long saed blong kampani

Lukaotem kontak blong emploia long websaet blong kampani. Nomoli oli stap listim ol kontak blong olgeta long en blong advert blong wok we oli postem.

### Go stret blong kontaktem olgeta

Introdusim yuwan long emploia ia. Yu save askem long olgeta long saed blong deit blong statem wok, proses blong rikriutmen, o talem se yu stap aplae long wan PR (Permanent Resident) Visa, we hem i PEV, mo yu intres long rol ia. Ol kaen toktok olsem hem i stret long profesonel saed mo hem i helpem yu blong bildimap wan gudfala rilesensip wetem olgeta.

### Foloap long ol aplikesen we yu putum

Long Ostrelia, hem i nomol nomo blong ol apliken oli kontaktem ol emploia afta we oli aplae long wan wok. Yu save sendem wan mesej we yu toktok kaen o yu kolem olgeta blong askem long saed blong aplikesen blong yu.

## Hao blong faenem kontak blong emploia

- Jekem long advert blong wok sapos oli bin listim nem o kontak blong haering maneja o olgeta we oli mekem rikriutmen
- Sapos oli listim nem blong kampani nomo, maet yu save faenem moa infomesen long:
  - Websaet blong kampani - lukaotem pej we i talem 'Careers' o 'About Us' blong faenem ples we kontak blong ol human risos o rikruitmen tim i stap long hem. Mo tu, yu save lukaotem wan pej we i talem 'Contact' we i gat wan fon namba o imel adres blong kampani we yu save yusum blong askem kontak blong haering maneja
  - LinkedIn - sej long pej blong kampani mo luk ol woka blong olgeta. Lukaotem ol maneja long saed blong human risos, rikruitmen o haering.

Sapos yu no save faenem kontak blong emploia, no wari tumas. Yu save aplae yet long rol ia - taem yu raetem wan leta blong aplae (long Inglis), bae yu putum toktok ia "Dear Hiring Manager" o "To the Recruitment Team" we tugeta i stret blong yusum. No mestem blong putum nem blong kampani insaed long leta blong yu blong mekem sua se aplikesen blong yu i sutum stret kampani mo wok we yu stap aplae from.

## Samfala tingting taem yu yusum ol websaet ia

Sapos yu yusum ol kaen websaet olsem blong lukaotem wok hem i save helpem yu blong sevem taem mo no mestem ol opotuniti blong wok. Ol tingting daon bae i save helpem yu blong mekem wan sej blong lukaotem wok mo blong gat moa janis blong faenem wan stret wok blong yu.

- Fulumap onlaen profael blong yu blong mekem i moa isi blong ol emploia oli faenem yu
- Setemap ol alet blong lukaotem wok we hem i stret long ol skil blong yu mo ples we yu wantem go long hem
- Taem yu mekem wan sej, yusum ol stret wod we hem i link wetem ol skil mo intres blong yu long saed blong wok
- No yusum wan websaet nomo blong lukaotem wok. Ol emploia oli stap yusum ol difdifren websaet
- Jekem ol bigfala websaet evritaem from oli stap postem ol wok evri dei
- Sapos yu stap lukaotem ol speselis kaen wok, i gud blong jekem ol websaet blong indastri blong hem.

### SEEK ([seek.com.au](https://www.seek.com.au))

- Hem i men websaet blong ol wok long Ostrelia mo hem i listim bitim plante taosen advert blong wok
- Yu save aplodem resume blong yu, setemap ol alet blong lukaotem wok, mo ridim ol gaed blong salari mo ol rivi long kampani.

### Indeed Australia ([indeed.com.au](https://www.indeed.com.au))

- Hem i wan websaet blong lukaotem wok raonwol mo i gat plante wok long Ostrelia we oli listim
- Hem i stap karem infomesen blong ol wok long ol websaet blong ol kampani mo ol narafala websaet blong wok
- Hem i gat ol simpel filta blong mekem sej.

### Australian JobSearch ([jobsearch.gov.au](https://www.jobsearch.gov.au))

- Hem i ofisel websaet blong ol wok long gavman
- Hem i fri blong yusum
- Hem i inkludum ol entri-level wok mo ol apprenticeship (wok mo kasem trening semtaem).

### LinkedIn ([linkedin.com](https://www.linkedin.com))

- Hem i wan websaet raonwol we hem i blong mekem profesonel networking mo i gat plante wok we oli listim
- Ol emploia mo ol rikriutmen ejensi oli stap postem ol wok
- Yu save mekem wan fri profael blong soemaot ol skil mo ol eksperiens blong yu long saed blong wok mo blong konek wetem ol emploia.



## Kontaktem Emploimen Sapot Sevis blong PEV

Emloimen Sapot Sevis blong PEV i stap blong:

- Sapotem yu blong lukaotem wok
- Helpem yu blong toktok wetem ol emloia wetem konfidens
- Jekem gud ofa blong wok we yu risivim blong mekem sua se hem i stret folem ol rul blong visa
- Toktok stret wetem ol emloia long bihaf blong yu blong jekem wetaem blong statem wok mo ol diteil blong kontrak
- Givim samfala risos long yu blong helpem yu rere long wok long Ostrelia.



Yu save kasem moa infomesen long saed blong Emploimen Sapot Sevis blong PEV long websaet ia: [pev.gov.au](http://pev.gov.au)

Long websaet blong mifala, yu save faenem moa risos, olsem ol pepa blong infomesen long saed blong emloimen mo ol templet blong mekem wan resume (CV). Mo tu yu save saenap long ol Emploimen Infomesen Sesen blong lanem moa long saed blong hao blong lukaotem wok long Ostrelia.

